

每週經課朗誦經文(巴克禮台語漢字)2013/12/15

共同經課 - 1

以賽亞書三十五章一節~十節

1 曠野及乾燥的地確歡喜；沙漠亦欲快樂；閤親像玫瑰開花，2 伊欲開花茂盛，來歡喜，欲有歡喜及唱歌。黎巴嫩的榮光，迦密及沙崙的媛，欲歸伊。in欲看見耶和華的榮光，咱的上帝的美妙。3 恁著互軟弱的手勇壯，無力的腳頭窩自在。4 對小膽的人講：恁著剛強，毋免驚。看啊，恁的上帝欲來報讎，欲來行極大的報應；伊欲來拯救恁。5 彼時，睛暝人的目矚欲開；臭耳聾的耳孔欲利。6 彼時，跛腳者欲跳親像鹿；啞口的舌欲唱歌。因為水滄出佇曠野；溪流滄出佇沙漠。7 發出光的沙欲變做水池；乾燥的地欲變做水泉。佇山狗倒啲暈的所在，欲有青草、蘆葦，及蒲草。8 佇遐欲有一條高的路，此條路欲稱做聖的路。污穢的人袂得通經過，專專欲做in的路用；行路的人雖然愚戇，亦袂行錯。9 佇遐的確無獅，猛獸亦無上此條路；佇遐攏無抵著in，獨獨得著贖回的百姓佇遐行。10 閤耶和華救贖的百姓欲倒轉來，欲唱歌來到錫安；得著永遠的歡喜做冕旒；in欲歡喜快樂，憂悶吐氣攏欲走去。

共同經課 - 2

路加福音一章四十七節~五十五節

47 我的心尊敬主做大；我的神因為救我的上帝來歡喜；48 因為伊看顧奴婢的卑微；對今以後，萬世代欲講我有福氣。49 因為彼個有權能者，為著我做大的代誌；伊的名是聖。50 敬畏伊的人伊憐憫in，到代代。51 伊曾用伊的手出氣力；心志驕傲的人伊有趕散in。52 有權能的人伊搓(lut)in的位，卑微的人伊升in做高；53 朽的人伊用好物互in食到飽，富的人伊互in空空倒去。54 伊扶助伊的奴僕以色列，55 來紀念憐憫，照伊對咱的祖所講的話，來施落互亞伯拉罕及伊的後裔到永世代。

共同經課 - 3

雅各書五章七節~十節

7 兄弟啊，所以恁著常常吞悞，到佇主的降落。你看，作穡人聽候地上寶貝的土產，常常吞悞啲聽候伊到得著秋霖春雨。8 恁也著常常吞悞，堅固恁的心，因為主的降臨近啦。9 兄弟啊，莫得相怨妒，免得恁受審判。你看，審判司已經倚佇門口。10 兄弟啊，許個託主的名來講的先知，恁著取in做受患難吞悞的模樣。

共同經課 - 4

馬太福音十一章二節~十一節

2 約翰佇監裡聽見基督所行的事，就差學生問伊講：3 「所欲來的是你嗎？抑是阮著向望別人啊？」4 耶穌應講：「恁著去，將恁所聽見所看見的、給約翰講。5 就是睛暝者看見，跛腳者行，癩疔(thái-ko)者清氣，臭耳聾者聽見，死的人復活，喪鄉人得著聽福音。6 見若無佇我來著觸的有福氣！」7 in去的時，耶穌才提起約翰給眾人講：「恁前出去曠野欲看甚麼？是蘆竹互風吹振動嗎？8 恁出去愛看甚麼？是人穿幼軟的衣裳嗎？你看，穿幼軟的是佇王宮。9 若是按呢恁出去欲啥事？是欲看先知嗎？是啦。我給恁講，伊是猶卡贏過先知。10 此人就是經裡所指的講：『我差我的使者佇你的面前，伊欲佇你的頭前備辦你的路』。11 我實在給恁講，婦仁人所生的，從中未有興起卡大佇行洗禮的約翰；總是佇天國的微細的，猶卡大伊。